

# TULAFONO TAU FAAOFI O TEUTEUGA O LE TULAFONO O LE KOMISI O LE GAGANA SAMOA 2019

## SAMOA

### Faamatalaga e Faamalamalama ai

#### Sini ma mafuaaga:

Ua taumafai le Tulafono Tau Faaofi e teuteu le Tulafono o le Komisi o le Gagana Samoa 2014 (“Tulafono Autu”), ina ia siitia le fuainumera o sui auai o le Komiti Faatino a le Komisi, ia aofia ai sui mai Niu Sila (NZ), Amerika Samoa ma se faiaoga o le Gagana Samoa mai le Fono a Faiaoga. Ua faapea foi ona aiaia i le Tulafono Tau Faaofi le suiga i le aofaiga o sui auai e mafai ai ona usua se fonotaga, ma mataupu o lo o faamanino ai le itu i alauni e agavaa i ai sui o Niu Sila ma Amerika Samoa.

#### Fuaiupu:

- Fuaiupu 1:** - ua aiaia ai mo le igoa puupuu ma le aso e amata faamamaluina ai le Tulafono Tau Faaofi.
- Fuaiupu 2:** - ua teuteuina ai le fuaiupu 8 o le Tulafono Autu, e ala i le suia o le faafuaiupu (1)(b) o i ai nei, ina ia atagia ai le siitia o le fuainumera o sui auai i le 12, ia aofia ai sui o le Faalapotopotoga mo le Aoaoina o le Gagana Samoa i Aotearoa (NZ), o se sui mai Amerika Samoa ma se faiaoga e toatasi o le Gagana Samoa e fai ma sui o le Fono a Faiaoga o Samoa.
- Fuaiupu 3:** - ua teuteuina ai le fuaiupu 10(3)(b) o le Tulafono autu, e ala i le suia o le fuainumera “4” i le fuainumera “5”.

**Fuaiupu 4:** - ua aiaia ai mo totogi ma alauni e agavaa i ai sui auai tofia mai Niu Sila ma Amerika Samoa.



.....  
(Hon LOAU Solamalemalo Keneti Sio)

**MINISITA O AOGA, TAALOGA MA AGANUU**

**TULAFONO TAU FAAOFI O TEUTEUGA O LE  
TULAFONO O LE KOMISI O LE GAGANA SAMOA 2019**

**SAMOA**

**Faatulagaina o Aiaiga**

1. Igoa puupuu ma le amataga
2. Ua teuteuina le fuaiupu 8
3. Ua teuteuina le fuaiupu 10
4. Ua teuteuina le fuaiupu 12

---

**2019, Nu.**

**O SE TULAFONO TAU FAAOFI UA TAU**

**O SE TULAFONO e teuteu ai le Tulafono o le Komisi o le Gagana Samoa 2014  
("Tulafono autu").**

**UA FAIA** e le Fono Aoao Faitulafono a Samoa i totonu o le Palemene ua potopoto e faapea:

**1. Igoa puupuu ma le amataga:**

E mafai ona taua lenei Tulafono o le Tulafono o Teuteuga o le Tulafono o le Komisi o le Gagana Samoa 2019 ma e amata faamamaluina i le aso e tuuina i ai le maliega a le O Le Ao o le Malo.

**2. Ua teuteuina le fuaiupu 8:**

Mo le fuaiupu 8(1)(b) o le Tulafono autu, ia suia e faapea:

“(b) sui auai e 12 e tofia e le O Le Ao O le Malo, i le faia i luga o le fautuaga a le Kapeneta, o le toatolu (3) o i latou e tatau ona aofia ai le sui e toatasi (1) mai le Faalapotopotoga mo le Aoaina o le Gagana Samoa i Aotearoa i Niu Sila, toatasi (1) le sui mai Amerika Samoa ma se sui mai le Fono a Faiaoga o Samoa, o ia o se faiaoga o le Gagana Samoa.”.

**3. Ua teuteuina le fuaiupu 10:**

I totonu o le fuaiupu 10(3)(b) o le Tulafono autu, mo le fuainumera “4”, ia suia i le fuainumera “5”.

**4. Ua teuteuina le fuaiupu 12:**

I le tuanai ai o le fuaiupu 12(2) o le Tulafono autu, ia faaofi e faapea:

“(3) Mo sui auai tofia mai Niu Sila ma Amerika Samoa, o totogi ma alauni e mafai ona latou agavaa i ai i lalo o lenei fuaiupu, e lē aofia ai alauni malaga po o tupe alu i Samoa ma alauni o fale e api ai po o tupe alu a o i ai i totonu o Samoa.”.

---